



Komunikadu Imprensa
26 Abril 2019

**Selebra Aniversáriu JSMP ba dala XVIII:
JSMP sei Lansa relatóriu Anuál Setór Justisa no Lejislativu 2018 no Relatóriu
Institusionál JSMP 2018**

Aniversáriu JSMP ba dala XVIII monu iha 28 Abril no sei selebra iha 30 Abril 2019. Iha tempu hanesan JSMP mós lansa relatóriu anuál rua kona-ba Observasaun Jerál ba Setór Judisiáriu (OJS)-2018, Relatóriu Observasaun Parlamentár (ROP)-2018. Aleinde ne'e JSMP mós sei lansa Relatóriu Institusionál JSMP ba períodu 2018 nian.

Relatóriu anuál rua elabora kona-ba rezultadu observasaun regulár ba iha dezvoltamentu importante no dezafiu sira iha setór judisiáriu no lejislativu no relatóriu institusionál kona-ba JSMP nian atividade durante tinan 2018 nian. Relatóriu institusionál ne'e atu informa deit kona-ba JSMP nia fontes orsamentu no ezekusaun atividade ne'ebé implementa durante tinan 2018.

“Lansa relatóriu anual iha aniversáriu JSMP nu'udar kustume ne'ebé tinan-tinan JSMP halo. Ba tinan ida-ne'e mós iha selebrasaun aniversáriu ba dala XVIII, JSMP sei lansa relatóriu kona-ba setór judisiáriu, lejislativu no relatóriu institusionál,” dehan Luis de Oliveira Sampaio, Diretór Ezekutivu JSMP.

Relatóriu Observasaun Jerál Setór Judisiáriu diskute kona-ba progresu no dezafiu sira iha setór justisa nian, inklui estatística kazu sira ne'ebé julga iha tribunál distritál sira no Tribunál Rekursu durante tinan 2018. Partikularmente relatóriu ne'e elabora kazu sira ne'ebé julga iha tribunál sira, hanesan krime violénsia doméstika, violasaun seksuál no krime sira ho natureza korrupsaun.

Relatóriu Observasaun Parlamentár konstitui informasaun kona-ba situasaun polítika iha 2018 hahú hosi disolusaun Parlamentu Nasionál to'o formasaun Governu Konstitusionál VIII nian. Aleinde ne'e, deskreve mós kestaun pontualidade no produtividade deputadu sira inklui preokupasaun comunidade nian durante JSMP halo treinamentu.

Enkuantu Relatóriu Instituisaun JSMP, rezumu atividade sira JSMP nian durante tinan 2018 inklui kooperasaun institusionál ho instituisaun xave no rede nasional no internasionál sira.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77295795
www.jsmp.tl
info@jsmp.minihub.org
Facebook: www.facebook.com/timorleste.jsmp
Twitter: @JSMPtl

Relatóriu ne'e mós deskreve apoiu finansiamentu ne'ebé JSMP simu doadores sira nu'udar justifikasaun no forma akuntabilidade ba públiku.

JSMP hein katak relatóriu hirak ne'e bele fornese informasaun útil ba públiku no partikularmente ba órgaun no instituisaun Estadu relevante sira.

Relatóriu ne'e konklui ho rekomendasaun importante no relevante balun ne'ebé dirije diretamente ba órgaun no instituisaun competente no relevante sira atu bele tau iha konsiderasaun. JSMP espera katak rekomendasaun importante hirak ne'e bele hetan konsiderasaun hodi hadi'ak funksionamentu sistema justisa formál no lejislativu iha agora no ba futuru.

JSMP sei hato'o intervensaun importante hosi autór prinsipal sira hanesan hosi Parlamentu Nasionál, Governu no Tribunál sei pública iha publikasaun tuir mai.

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

Telefone: 3323883

www.jsmp.tl